

■ ELECZIUNS DAL CUSSEGL DALS CHANTUNS 2011

Stefan Engler e Martin Schmid

Na ils emprims cussegliers guvernativs grischuns a Berna

DA GIUSEP CAPAUL

Stefan Engler, Surava, anteriur cusseglier guvernativ dal Grischun, è vegni nominà cun ina «standing ovation» da la Partida cristiandemocratica (pcd) dal Grischun sco candidat e successur da Theo Maissen, Sevgein, per il cussegl dals chantuns. Da cuminanza cun l'actual cusseglier guvernativ e president da la regenza, *Martin Schmid*, da Spleia, vegnan els dus, or dal Grischun central, a furmar en l'avegnir in team fitg ferm e competent per il Grischun a Berna.

Fertant che cun a. cuss. gov. *Stefan Engler* succeda in cristiandemocrat sin in da la medema partida, datti cun cuss. gov. *Martin Schmid* – suenter 76 onns – per l'emprima giada puspè in represchentant da la Partida liberala grischuna – suenter ina lunga retscha dad anteriurs democrats e pli tard populars en la chombra pitschna a Berna. Lur tscherna è bain pli che segira e stat perquai era bravamain en la sumbriva da l'elecziun en il cussegl naziunal.

Fin 1979 cusseglier guvernativ e parlamentari federal enina

Stefan Engler n'è per dabler betg l'emprim anteriur cusseglier guvernativ dal Grischun per Berna en il parlament federal. Fin 1979 èsi numnadamain stà pussaivel ch'in cusseglier guvernativ pu-



Ils dus sulets candidats per il cussegl dals chantuns: *Stefan Engler* (pcd) (dretg) e *Martin Schmid* (pld).

deva esser il medem mument era parlamentari federal (cusseglier naziunal u dals chantuns). Lez onn ha il suveran grischun votà cun 22 796:9811 vuschs cle-ramain per la incompatibilità (nuncolliaziun) d'in mandat guvernativ cun il federal. Il davos cusseglier guvernativ,

ch'era il medem mument tant en la regenza sco a Berna è stà il liberal *Jakob Schutz* (1969–1978 cusseglier guvernativ, 1975–1979 en il cussegl naziunal).

Dapi la fundaziun da la odierna pcd grischuna (1903) ha quella tramess – senza interrupziun – in dals ses en il cus-

segl dals chantuns. En tut èn quai stads en pli che 100 onns na main che nov cussegliers dals stans cristiandemocrats, en la media pia mintgin durant 12 onns. Da quels han sis da nov appartegnì avant u durant lur temp a Berna a la regenza.

Dus da quels nov cussegliers dals stans

cristiandemocrats derivavan dal Grischun central: *Franz Peterelli*, da Savognin, e *Friedrich Brügger*, da Curvalda, *Franz Peterelli* è stà il sulet Surmiran dapi 1903 en il cussegl dals chantuns. Omdus eran, avant ch'ir a Berna, en la regenza. Dal Plaun eran medemamain dus cussegliers dals stans: *Gieri Willi* e *Giusep Vieli*, anteriurs commembers da la regenza. Dals tschintg cussegliers dals chantuns ord la Surselva han dus appartegnì a la regenza. Fertant che *Gion Darms* è i a Berna suenter ses temp en la regenza, ha *Gion Giusep Huonder* appartegnì a la regenza (1927–1935) ed il medem mument er al cussegl dals chantuns (1930–1935) – fin sia mort en uffizi. Il davos cristiandemocrat ch'era tant commember da la regenza sco dal cussegl naziunal è stà *Ettore Tenchio* (1947–1971 en il cussegl naziunal e 1950–1959 en la regenza).

Appartegnientscha simultana d'in cusseglier guvernativ grischun al pöarlament federal è stà fin 1979 plitost la regla che l'exceptiun. Che tants anteriurs regents dal Grischun han fatg suveranamain il pass da la chasa grischuna en la chasa federala è in zunt bun omen per ils dus candidats d'uonn: *Stefan Engler* e *Martin Schmid*. Esser stà, u esser en la regenza, è numnadamain – tenor experientscha – anc oz ina referenza e recumandaziun electorala prest absoluta.